


www.diarioaruba.com
The way business moves!
DIARIO
Online
 E Matutino di Aruba

Lesamento a bira manera "Tumamento di Purgashi"

Casi semanalmente mi tin un of otro klas di school di bishita na redaccion y cada docente cu ta bin cu e muchanan y hobennan aki por confirma, cu un punto cu mi ta trece continuamente dilanti na e muchanan y hobennan ta: **"lesa, lesa y sigui lesa!"**

Mi a ricibi hopi yamada ayera pa e columna riba **"cortesía"**, y principalmente e E-mail di Cecilia, mi a keda contento cune y ta sigur cu mi a **"yega"** cerca un persona.

Den un di e yamadanan un mama a puntrami con por haci pa su yiu por lesa, pasobra e yiu ta **"odia"** lesamento y esaki ta perhudike na school tambe.

Hendenan cu conoce mi bon, sa tambe cu na mi cas, tur ora cu nan yega, nan ta hayami ta lesa.

Por ta un corant o por ta un buki, pero mi ta lesa y lesa, y no ta importa kico e ta cu mi tin cu lesa.

Hopi hende, principalmente hobennan, no ta kere cu lesamento ta di importancia.

Sigur ta cu hendenan cu ta lesa tin un IQ mas halto cu otronan, y ta mas creativo, ta mihor na school y ta haya mihor trabaonan den mayoria di caso.

Tempo nos tabata mucha, no tabata tin television, ni video, ni weganan di video, ni cable, ni internet.

Pasatempo di hopi mucha y hoben tabata lesamento.

Desafortunadamente nos a perde e habilidad di lesa y e pasion pa lesamento den e bida cu nos ta hibando awendia.

Mi ta sigur si un hende pone mey ora **"un banda"** tur dia pa lesa, lo no dura mucho cu e lo **"enamora"** lesamento.

Aki mi no ta papia di corantnan.

Hopi hende ta lesa corant djis pa cierto noticianan y despues ta tira corant un banda, y ta bisa cu nan sa lesa corant.

Mi ta papia di lesamento di mas tanto corant posibel, di tur idioma, y hasta avisonan comercial.

Lesamento di prome letter na bo man robez ariba, riba prome pagina, te cu e ultimo letter na bo man drechi, di e ultimo pagina.

Di buki mi ta bisa, lesa tur sorto di buki, no solamente novela, pero tambe bukinan educativo, bukinan di ciencia, riba salud, riba bida social, riba construccin, riba decoracion, etc.

Door di lesamento bo interes ta crece pa bula di un sorto di buki pa otro sorto, di un tema pa otro tema, y di tur di nan bo ta siña.

Loke cualquier hoben kier lesa pa placer, mester wordo encurasha. Importante ta cu e ta lesando algo cu e ta goza di dje, djis pa placer.

LAGA E MARIBOMBA DI LESAMENTO PICABO

Nos biblioteca, tanto na Playa como na San Nicolas ta promove lesamento y tin actividadnan special pa encurasha muchanan y hobennan pa lesa.

Si bo no sa kico pa lesa, na biblioteca tin suficiente profesional cu por guiabo, segun e interes cu bo ta demostra pa cierto lectura.

Bira miembro y bay cas cu por lo menos un buki pa luna, pasobra e un buki aki, despues lo bira dos, y aumenta pa mas ora cu e **"maribomba di lesamento"** picabo.

Con mi ta siña lesa?

Esey ta masha facil. Bo ta siña lesa door di lesa.

Bo ta desaroya e arte o habilidad di lesa door di lesamento.

Ta importante pa desaroya bo habilidad di lesa y bo lo ripara despues di poco tempo, cu bo ta progresando den bo conocimiento y kier mas pa lesa.

Bo ta aumenta bo vocabulario, no solamente den papiamento, si bo ta lesa bukinan na papiamento, pero den Hulandes, Ingles, y spaño tambe, si bo ta lesa bukinan, revistanan, corantnan etc. den e idiomaan aki.

DI LESAMENTO PA SKIRBIMENTO

Lesamento ta dunabo conocimiento di mundo.

Lesamento ta dunabo hasta gana di cuminsa skirbi, sea poesia, proza, cuentonan, novela etc.

Como mucha, nos ta siña palabra prome cu nos siña skirbi.

Nos ta siña spel palabra y nos ta siña pone palabranan hunto pa forma un frase. Nos ta sigui pa forma mas frase y ora nos kier skirbi, nos mester cuminsa un caminda.

Nos mester siña palabra (forma un vocabulario) y con pa usa e palabranan aki. Nos mester siña kico ta funciona pa nos y e mihor manera di siña ta di lesa y lesa.

Ora bo bira un lesador ferviente, bo ta cuminsa admira e estilonan di e diferente escritornan y admira tambe e manera cu nan ta skirbi, usa palabra y frasenan y bin aprecia escritornan grandi.

Recientemente mi a lesa un buki na Ingles titula **"Where is Choy"**, skirbi pa **"Himself"**.

E buki aki ta di un personadescendiente chinos, biba na Guyana y Trinidad, lucha den bida busca educacion na Merca, traha pa Lago, baha cu pension y cu su 80 y pico aña di edad a publica un buki riba su bida.

El a skirbi e buki pa su placer. E parti di su experiencia den refinaria Lago, ta masha interesante y historico.

Pero lesando e buki, y mirando e estilo cu el a aplica den su skirbimento, bo ta kere cu ta un Salman Rushdie chiquito a skirbi e buki aki.

Pa esnan cu no sa. Salman Rushdie ta e escritor ganador di Premio Nobel pa **"Versionan satanico"**.

"Himself", Sr. Isaac Chin, residencia na Barcadera a cay den mi admiracion mes ora como un gran escritor, y tres biaha mi a lesa e buki.

E no a promove e buki aki ningun caminda specifico, pero mi ta sigur cu lo por haye den biblioteca.

Mi a ricibi'e como regalo di **"Himself"** y no tabata pa promove tampoco, djis pami lesa, pero mi no por keda sin menciona e buki aki.

LESA Y HAYA GANA PA SKIRBI TAMBE

Na e momento aki mi ta lesando **"Parabola de Pablo (Escobar)"**.

E bida di Pablo Escobar, y di e buki aki mi tin gran admiracion pa e escritor, pa e manera cu el a haci su investigacion, y hinca e historia den otro, y cu cada pagina ta intrigabo, y pone cu bo kier sigui lesa. Bo ta conoce Pablo Escobar, conoce esnan cu tabata rond di dje, su familia, guardaespaldanan, conoce su bon y su malo, su bon curazon y e curazon cruel cu e tin.

Bo ta conoce e corrupcion cu tabata tin na Colombia e tempo ey, conoce esnan envolvi di president bin abao, di generalnan di ehército pa e soldat di rango mas abao, y tur di nan menciona cu number.

Mas bo lesa, mas gana bo ta haya di por skirbi y finalmente bo ta hayabo ta skirbi tambe.

Pa por skirbi, bo mester lesa obranan di otronan.

Bo ta hayabo ta lesa y na mes momento analiza loke bo ta lesa, bo ta ripara con e autor a escohe su palabranan of con e ta skirbi su frasenan.

Con nan ta describi e susedido den e buki.

Bo no ta realiza mes cu bo ta haciendo tur esaki.

Mas bo lesa mas conocimiento bo ta haya, mi por hasta bisa, mas sabi y inteligente bo ta bira.

Te ainda mi no a yega riba e importancia di mayornan pa lesa pa nan yiunan ni pa lesamento pa muchanan na school cu tambe lo ta largo pa skirbi ariba y den e espacio aki sigur no por yena tur cos.

Lesamento pa mucha ta encurasha su papiamento y desaroya su idioma.

Lesamento pa mucha for di chiquito yta yuda nan siña reglamentonan di lenguahe, siña nan scucha, concentra y siña, y na mes momento desaroya nan emocionnan y inteligencia.

Puntra un hende cu ta skirbi y e lo bisabo: **"Mi ta skirbi pasobra mi ta lesa"**.

Un escritor a yega di bisa **"mi ta prefera di keda sin come cu keda sin un buki"**.

Juby Naar.